

## Net in's Heim

Vor zehn Jahr' is mee Mo g'storb'm,  
und i bi wech und oid.

Alloa wohn' i do in meen Haus,  
des g'herat herg'richt't boid.

Solong wia's geht, wü do i b'leib'm,  
d'rüm steckt's mi bitt'sche net in's Heim.

Fria homa oft Kort'n g'spüt,  
mee Nachbarin und i.

Leida is si nimma do,  
i spü alloa mit d'Kort'n mi.

No long wü i im Haus do b'leib'm,  
es steckt's do g'wiss mi net in's Heim.

De Gicht, de plogt mi hefti scho,  
oft foit ma aus da Hond  
a Teula oda Glasl gor,  
'sis schod, owa koa Schond.

No ram' i d'Scherb'm weg und wü bleib'm,  
steckt's mi net in's Heim.

A mi'n Ess'n is's a Quirkst,  
is Kocha geht gor nimmamehr,  
z'longsom bi i, ois brennt on.  
„Essen auf Rädern“ muiß scho her.

Wos on'brennt, des soi on'brennt bleib'm,  
nur bitte, bitte net ins Heim.

I find' a meist'ns no auf's Klo.  
Guit, dass des no funktioniert,  
a wonn i g'spir' vo To zu To,  
dass's oiweu schwara wird.

Gonz longsom geh' i aus'n Leim,  
owa es steckt's mi – hoff' i – net in's Heim.

I mirk' mee Hirn losst a stork no,  
wonn i mi a no so konzentrier',  
vogiss' vos i g'rod macha wü.  
Des is d'Demenz, so kimmt's ma vir.

A wonn i no so vü vogiss':  
nur net ins Heim, vosprecht's mas – g'wiss!

Oft deng i no, wos amoi is,  
wonn i wirkli nimma ko,  
aus'm Bett nimma aussakimm.  
Wos fong' i oides Wei donn on?

Donn wü i do im Haus net bleib'm,  
Donn steckt's mi, weu's nix hüft, ins Heim.

*29.11.2024*